

Kalaallit Nunatsinni ataavartumik efterskoliliornissaq anguniarlugu Naalakkersuisut pilersaarusiornissaannik peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq Olga Poulsen Berthelsen, Inuit Ataqtigiit)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Naalakkersuisut sinnerlugit Olga Berthelsen, Inuit Ataqtigiit, qutsavigerusuppara Kalaallit Nunatsinni ataavartumik efterskoliliornissaq anguniarlugu Naalakkersuisut pilersaarusiornissaannik peqquneqarnissaannik Inatsisartut aalajangiiffisassaattut siunnersuutaanut.

Inuusuttorpassuit ukiut tamaasa efterskolimiinnissamut qinnuteqartarput, qallunaat efterskoliini imaluunniit Qasigiannguani efterskolimi pilersinneqaqqammersumi. Inuusuttut 300-ngajaat ukiumi atuarfiusumi uani Qallunaat Nunaanni efterskolini aallartipput, taavalu Villads Villadsenip Efterskoliani aammalu Kangerlussuarmi taassuma immikkoortorigallagaani atuartut 160-it aallartipput. Ukiumut atuarfiusumut 2010/2011-mut Villads Villadsenip Efterskolia atuartut inissaannut 80-inut 160-it sinnerlugit qinnuteqaatinik tigusaqarpoq. Ukiuni kingullerni siullermik efterskoliugallartunut taassumalu kingorna Qasigiannguani ataavartumik efterskolimut qinnuteqartarnerit takutippaat Kalaalli Nunaanni minnerpaamik efterskolimik ataatsimik suli pisariaqartitsisoqartoq.

Aammattaaq ukiuni kingullerni efterskolertarnerni misilittakkat takutippaat, atuartut Kalaallit Nunaanni efterskolertarnertik pissarsivigilluartaat, tamannalu nunatsinni efterskolimik suli ataatsimik pilersitsisoqartariaqarneranut takussutissaalluarpoq. Tunngavilersuut alla pingaaruteqartoq tassaavoq atuartut efterskolernissamut immaqa qinnuteqarsimassanngikkaluartut pisinnaasatigut inuttullu qaffassarniarlutik namminneq nunaminni efterskolernissamut maannakkut periarfissaqalernikuummata. Takuneqarsinnaalernikuuvoq Nunatsinni efterskolernissamut qinnuteqartut amerlanersaat nunaqarfimmeersuusut imaluunniit avinngarusimasuneersuusut, tamannalu imatut paasineqarsinnaavoq efterskolimik pilersitsinermi sullinniakkat nutaat periarfissinneqartut – sullinniakkat ilinniartitaanermi ingerlaqqinniarlutik Danmarkimi efterskolernissamut immaqa qinnuteqarsimassanngikkaluartut.

Naalakkersuisut taamaamat efterskolimik ataavartumik ataatsimik pilersitsinissamut periarfissat misissorlugit aallartinnikuuaat, ilimagalugulu Inatsisartut 2010-mi ukiakkut ataatsimiinneranni efterskolimik ataatsimik pilersitsinissamut pilersaarut saqqummiussinnaallugu.

Taamatut oqaaseqarlunga siunnersuutip Inatsisartuni akuersissutigineqannginnissaa inassuteqaatigaara.